

Watendakazi Pamoja na Yeye

Ninyi ni nuru ya ulimwengu—Mathayo 5:14.

Bwana wetu alikusudia kuwa kanisa Lake liwakilishe kwa ulimwengu ukamilifu na utoshelevu tunaupata Kwake. Daima tunapokea fadhila za Mungu na kwa kutoa fadhila hizo tunapaswa kuonesha kwa ulimwengu upendo na wema wa Yesu. Wakati mbingu yote ikiwa macho, ikituma wajumbe kwa kila sehemu ya dunia ili kusukuma mbele kazi ya ukombozi, kanisa la Mungu aliye hai linapaswa pia kufanya kazi pamoja na Yesu. Tu washirika wa mwili Wake wa ajabu. Yeye ni kichwa, akivitawala viungo vyote vya mwili.

Yesu Mwenyewe, katika huruma Yake isiyopimika, anafanya kazi katika mioyo ya wanadamu, akifanya mabadiliko ya kiroho ya kushangaza sana kiasi kwamba malaika hutazama kwa mshangao na furaha. Upendo huo huo usio na ubinafsi ambao humwainisha Bwana unaonekana katika tabia na maisha ya mfuasi wa kweli. Kristo anatarajia kuwa wanadamu watakuwa washirika wa asili Yake ya utakatifu wakiwa hapa duniani, hivyo basi si tu kuakisi utukufu Wake hata kumsifu Mungu, bali pia kuangazia giza la ulimwengu kwa miali ya mbinguni. Kwa namna hiyo yatatimizwa maneno ya Yesu: “Ninyi ni nuru ya ulimwengu.”

Sisi tu watendakazi pamoja na Mungu,” “mawakili wa neema nyingi ya Mungu.” Ufahamu wa neema ya Mungu, ukweli wa Neno Lake, na zawadi za maisha pia—muda na mali, talanta na mvuto—yote ni amana kutoka kwa Mungu ili kutumiwa kwa ajili ya utukufu Wake na kwa wokovu wa wanadamu. Hakuna kitu kinachoweza kumchukiza zaidi Mungu, ambaye kila mara anatoa zawadi Zake kwa mwanadamu, kuliko kumwona akizikumbatia karama hizi kwa ubinafsi na kutomrudishia Mpaji. Yesu yuko mbinguni leo akiandaa makao kwa wale wampendao; naam, zaidi ya majumba makubwa, ufalme ambao unapaswa kuwa wetu. Lakini wale watakaorithi Baraka hizi lazima wawe washirika wa kujikana nafsi na kujitoa mhanga kwa Yesu kwa ajili ya faida ya wengine.

Kamwe hakujawahi kuwa na hitaji kubwa la kazi ya bidii, ya kujitoa mhanga katika kazi ya Mungu kuliko sasa, wakati saa ya rehema inapokaribia kufungwa na ujumbe wa mwisho wa rehema unapaswa kutolewa kwa ulimwengu. Nafsi yangu inasisimka ndani yangu kama kilio cha Wamakedonia kitokacho kila upande, kutoka kwa miji na vijiji vya nchi yetu wenyewe, kutoka ng'ambo ya Atlantiki na Pasifiki yote, na kutoka visiwa vya bahari: “Vuka, uje ... utusaidie.” Kaka na dada, je, mtaitikia wito huu? mkisema: “Tutafanya kila tuwezalo kwa kuwatumia wamishenari na pesa pia. Tutajikana nafsi katika kuzipamba nyumba zetu, katika kujipamba nafsi zetu na katika kukidhi uchu wetu wa chakula. Tutatoa mali tulizokabidhiwa ziende kwa kazi ya Mungu na tutajitolea wenyewe pia bila kipingamizi kwa kazi Yake” Hebu kila dola unayoweza kuitunza iwekwe katika benki ya mbinguni

(Testimonies for the Church 5:731-733).